



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim tiryimyim@aolima tir yimyim TAPAK 6

Naomi Osaka Australian
Open nung masayatsü

NPP-i Uniform Civil Code magizüker:
Meghalaya CM Conrad



VOL. XX NO. 87 (ADOK 87) DIMAPUR TENTONÜ (MONDAY) ANEJETI (JANUARY) 09, 2023 ₹ 5.00

Centre-i CAA temzüng yanglutsü atema ita 6 meshiloker

Guwahati, January 8, 2023 (Agencies): Centre sorkari Citizenship (Amendment) Act, 2019 (CAA) mapa kuma tenzüksü atema ita trok meshiloker.

Union Home Ministry-i tang agi CAA atema tenetben mapang meshiloker.

CAA ya 2019 kum Parliament nung agizük aser iba ajanga December 31, 2014 matongdang Pakistan, Afghanistan aser Bangladesh nungi kulikaket kecha melii India-i aruba non-Muslim nunger nem India senso agütsütsü.

Iba Act indang temzüngtem yangludar aser Covid-19 wara ajanga mapang atsülanger ta November 24, 2022 nü Home Minister Amit Shah-i ashi.

"CAA ya linük indang ozüng ka lir aser CAA mapa metenzüksü ta pungmangbaji aibelen ka lir kechiyong mapa tenzüksü" ta Amit Shah-isa ashi.

Northeast State tem kübok tesem aika iba Act nung maden. Assam, Meghalaya, Mizoram mesüra Tripura nung lisopurtem alidak Constitution indang Sixth Schedule nung dena lir aser iba jagi Act kübok madener. Ano, Arunachal Pradesh, Mizoram, Nagaland aser Manipur state tema iba Act kübok medendaktsür.

Iba Act ajanga India senso agütsürtem 'exempted areas' nung alitsü makok.

Union Home Ministry-i Lok

Sabha aser Rajya Sabha naprong nung subordinate committee on parliamentary legislation dang nungi ita trok meshisem.

Rajya Sabha committee-i iba temepishiba agizükogo aser June 30 tashi mapang agütsüsemogo saka Lok Sabha committee nungi telangzüba mali ta osang ajanga ashi.

Taoba nung Home Ministry-i Rajya Sabha committee dang December 31, 2022 tashi aser Lok Sabha committee dang January 9, 2023 tashi temzüngtem yanglutsü atema mapang aginür ta shia liasü.

Ministry kati ozüng ka agizükba sülen mapang latettsüba ita trok tsüngda ozüng inyakyima aotsü maparen metemetetra, Committee on Subordinate Legislation nem kuli agüja mapang meshiloktsüla ta Manual on Parliamentary Work nung lateta lir.

CAA ya December 11, 2019 nü Parliament nung agizük aser December 12, 2019 nü India President-ia mulunga agizük.

Union Home Ministry-i iba Act ya January 10, 2020 nungi mapa kuma tenzüksü ta ashi saka tanü tashi rules mesangdongba ajanga Act mapa kuma inyaktsü makoker.

CAA agizükba sülen December 2019 aser March 2020 tsüngda Assam, Uttar Pradesh, Karnataka, Meghalaya aser Delhi nung iba Act anema lungkak aidang nisung 83 tashi süogo.

NSCN/GPRN shitak dang lir: Isak Sumi

Dimapur, January 8, 2023 (TYO): NSCN/GPRN-K telok shitak dang lir aser telok tasen ka razüka aotsü tebilemba kecha mali ta tanü metetdaksüogo.

Nisung kari tasa atongba ajanga January 4 nü NSCN/GPRN-K president Khango Konyak-i ozüng alema NSCN/GPRN-K lennir aser WC, NNPGs Co-convenor Isak Sumi telok nungi anentsü. Iba sülen January 5 nü rongdak senden ka nung NSCN/GPRN-K-i Khango Konyak anentsü.

Tanü osangbener senden ka nung Isak Sumi-i nisung shinga atema tebilemba tamajung mali aser olulu nem manishidaktsür ta ashi.

Pai Khango dang pa nem tatok agütsütsü aser putepshitsü atema mepishia liasü ta Isak-isa ashi.

"Onoki Khango nungi telangzüba ata saka kecha manguba agi NSCN/GPRN-i pa anentsütsü atema bangzüng ka

renem. Iba atema sasaa bilemer saka iba ya kü kijai masü saka NSCN/GPRN külem lemet ka liasü" ta Isak-isa metetdaksü.

"Telok nung mepetmesü adokba ya Khango ajanga masü saka nisung kari tasa atonga inyakba lir. Khango-i telok nung adentsü aser putepshitsü mulungra ni NSCN/GPRN den jembitsü renema lir" ta paisa ashi.

Iba tatalokba ya liaka NSCN/GPRN-i maneni India sorkar den ceasefire alitsü aser Working Committee, Naga National Political Groups (NNPGs) nung NSCN/GPRN tenüng nung co-convenor inyaktsü, ta Isak-isa ashi.

Tanga telemtetba ka magi tashi NSCN/GPRN vice president Luyanba Yimkhiung-i acting president ama inyaka atatsü, ta paisa metetdaksü.

India sorkari iba tatalokba indang osang metetpelar aser NSCN/GPRN-ia Centre den tongtepdar, ta Isak-i ashi.

Asür Dr. Imtiwabang Aier den state funeral agiogo



The Heritage, DC Bungalow Kohima nung taoba NLA Speaker aser MLA asür Dr. Imtiwabang Aier den asüpila sentep sentong agiba noksa angur.

Dimapur, January 8, 2023 (TYO): Nagaland state sorkari taoba NLA Speaker aser MLA asür Dr. Imtiwabang Aier den asüpila sentep sentong ka ayonga agiogo.

January 8, 2023 nü The Heritage, DC Bungalow Kohima nung iba sentong agia liasü.

Sentong nung 13 buba Nagaland Legislative Assembly Speaker Sharingain Longkumer-i assembly züngsemtem aser par kibong tenüng nung Dr. Imtiwabang kinungtsü Kiehungle, tanurtem aser kinungertem den mangyimba osang lemsatop.

"Asür Dr. Imtiwabang ya 23 Impur AC nungi MLA liasü aser Geology and Mining nung Parliamentary Secretary inyakba sülen March 21, 2017 nü NLA speaker inyaktsü shimtet. Maneni pa 2018 nunga kasa constituency nungi takok ngur MLA ka ama teinyakdak nung alima nung pila" ta Speaker Sharingain-i ashi.

Planning & Coordination, Parliamentary Affairs Minister Neiba Kronu aser Rural Development Minister Metsubo Jamir (Ao Legislature Forum) natia sentong nung temulung raksaba aser mangyimba osang lemsatop.

Taoba Nagaland Chief Minister aser United Democratic Alliance (UDA) Chairman T.R. Zeliang-ia pa tenu kinungbo asüba atema kanga temulung raksaba osang metetdaksü.

"Asür Dr. Imtiwabang ji pei asoshi masü saka nübortem asoshi bilema bendanga agüja

inyakba nisung ka liasü. Pa ya kü indang anük ka dang masü saka medemer tajung ka liasü" ta T.R. Zeliang-i ashi.

"Asür Dr. Imtiwabang ji tangatetba tajung aliba aser temulung lemetetba nisung ka liasü aser pa asüba ya Aor aser Naga nunger ajak atema takoksa ulura lir" ta paisa shisem.

Iba sentong nung asür kinungtsü Kiehungle-ia la kinungbo temang manemi aruba aser ajungbena asüba osang lemsatop aser nübortem den sorkari temeim sayuba atema pelaba metetdaksü.

Süngratsü Senso Telongjem Kohima Tir Er. W.L. Wati aser Kohima Aor Telongjem Tir Chubalezuk nati o jembidang temeimertem aser state sorkar dang pelaba ashi aser telok tenüng nung asükhu lemsatopba metetdaksü.

Iba sentong nung DEF Kohima-i asür Dr. Imtiwabang Aier nem Guard of Honour agütsü aser "Kiwihira String Quartet" atem.

Sentong nung mendenji Secretary-in-charge NLA, Khruhituno Rio liasü, Nagaland Governor Prof. Jagdish Mukhi aser stata sorkar indang mangyimba osangtem zünga metetdaksü aser State Chaplain Rev. T.W. Yamyap Konyak-i Tsüngrem o jembi.

Asür Dr. Imtiwabang Aier den asüpila sentep sentong nung Kuzholuzo Nienu, Dr. Chumben Murry, Development Commissioner A.S. Bhatia,

Home Commissioner Abhijit Sinha nunger den Minister, Advisor aser MLA tem aser sorkar ketdangtsür aika aden.

Iba sentep agiba sülen asür Dr. Imtiwabang Aier'er tasoyim Süngratsü nung pa teti atema anisüngzüksü bener ao.

Asür Dr. Imtiwabang Aier indang temetettsü

Dr. Imtiwabang Aier ya Sashitoba Aier aser Pokienla Jamir na jabaso lir aser pa January 22, 1973 nü aso. Tanur pungu rongnung pa tambusang liasü.

Dr Imtiwabang aser pa kinungtsü Kiehungle na jala 4 aser jabaso 1 moaja lir.

Pai Kohima Science College Jotsoma nung 2000-2002 tashi lecturer inyak, 2005-2006 tashi Nagaland University (NU) nung Guest Lecturer, 2005-2006 tashi Project Assistant, DST, New Delhi aser 2008-2011 tashi Senior Research Fellow, DST, New Delhi inyak.

Pai 2013 kum 23-Impur Assembly Constituency nungi Congress (1) candidate ama toktepa takok ngur 12 buba Nagaland Legislative Assembly nung MLA aküm. Idangji pai Geology and Mining indang Parliamentary Secretary inyak aser iba sülen Nagaland Legislative Assembly indang Speaker inyak.

2018 assembly elections nunga pai NPF party ticket amer takok ngua 13 buba NLA nung MLA ka ama teinyakdak nung alima nungi pila.

Nagaland nung driver ka tepsetba atema Manipur nung lungkak aiter

Guwahati, January 8, 2023 (Agencies): Manipur nunger driver ka tepsetba atema tejashi nung tetsürtemi mapang telatet makai Imphal-Tiddim mokdang lungkak aittsü tenzükogo.

Manipur driver Yengkhom Priyobrata pur aoba aser tepsetba anema onoki lungkak aiter ta tetsürtemi ashi.

Osang angazükba agi Manipur nung driver temia iba tatalokba anema lungkak aittsü sentong lir.

Iba lendong atema Manipur police-i bushisüngdang ka süogo aser Nagaland police dang nungi osang meshiogo.

Manipur nunger driver Yengkhom ya December 30, 2022 nü pur ao aser Honibarnü Nagaland nung pa indang tasümgang angu.

"Kü kinungbo ya Imphal aser Moreh tsüngda passenger anishi. December 30, 2022 aonung 9:00 ako meta pa passenger kar anir Nagaland-i aotsü ta phone ajanga

ashi" ta Yengkhom kinungtsü Priyobrata-i ashi.

"Iba sülen onoki pa dangi phone asü saka pai mobile phone magizük aser tatsüka lir 'switched off' aküm. Onoki January 2 nü Bishnupur police station nung nisung samaba ken o ka benok" ta laisa ashi.

Nagaland kübok tesem kar nung Manipur nunger driver tem dak züka merenshiba, tepsetba aser auyaba tatalokba aika lir ta Manipur Police-i ashi.

LKM küm 75 bensa washimung aser Saisapong tenzüker

Dimapur, Jan.08 (TYO) : Langpangkong Kaketshir Mungdang (LKM) tenzüker küm 75 abensaba washimung den repsema 33 buba Saisapong sentong Chuchuyimlang nung January 09 aonung nungi tenzüka January 13, 2023 tashi amungtsü sentong tulu renema lir.

Iba sentong nung akhümdong asütsü asoshi PWD minister Wb. Tongpang Ozüküm, advisor Wb.Imnatiba aser Wb.Amenba Yaden ,MLA den Chief Information Commissioner, Wb.I.Meyionen Jamir nungertem tongti shilem agitsü jaoka lir.

Mezüng aonung LKM 75 bensa washimung sentong nung Dr.Wt.Sentitula Pongen, IFS, DFO Mokokchung tongti o



jembir asütsü. Lai iba Washimung aser Saisapong omen "Terangrang Lensar" omen nung jembitsü.

Iba sentong nung AKM aser Phom Students' Conference den ano tükong aser tentet balala nungi lenirtemi salem o ashitsü aser tajungshi aser tayongzüka o jembitsü agüja lir.

Iba mungdang sentong nungsa kaketshiba wadang balala nung tematiba takok jenjang angurtem nem 'L.Pangstersowa Jamir Trust Award for Academic Excellence aser L.L.Yaden Meritorious Scholarship agütsütsü renema lir aser Washimung washitep chiyonggba mapang January 10 anüngdang alitsü.

2023 LKM saisapong sentong nung football asaya nung yimtsüng kaketshir telongjem 16-i shilem agitsü aser volleyball asaya nung teburtem yimtsüng 8 aser tetsürtem yimtsüng 5 nungi asayatsü sentong yanglua lir. Item asaya ajakji 'league system' asayatsü atema asayadak tesem play ground anana renema lir.

NPP tir-i asükhü lemsatep

Dimapur, Aenjeti/January 8 (TYO): NPP Nagaland tir Dr. Andrew Ahoto Sema-i sangdong ka ajanga, MLA aser taoba Nagaland Legislative Assembly Speaker asür Dr. Imtiwapang Aier mapa tatsüka Shiranga liyar January 7 nü Dimapur nung asüba osang angazüka Nagaland ajunga aser talisa National People's Party (NPP), Nagaland State kanga aoksaba lemsatepogo.

Nübur lenir ka ama MLA, asür Dr. Imtiwapang Aier ya statesman ka liasü aser pai kin, loktitentet aser tamangba yimsü lokti tentet balala nungi nüburtem ajungketsü atema takokba tashi tajungtiba inyakogo.

Pa asüba ya Nagaland aser

talisa Aoer tem atema takoksa tulu lir, shiba kanga dang tedangshi lenir ka liasü aser Naga nunger ajangzükdaktsütsü aser temeden atema ajang ajanga nokdakogo. Pa asüba ajanga tawa tulu ka adokdaktsütsü, koba süngdaktsütsü asoshi tasak asütsü, ta pai ashi.

Mangyim jashi tia nung aliba mapang ni NPP Nagaland tenüng nung asür nem aküm tetushi agütsür aser asür kinungertem nem asükhü lemsatep. Tulusang Tsüngremi pa kinungtsü aser kinungertem nem anisüngzüik aser tasü tait tanüla agüjang ta sarasademsür aser pa tanüla teti tatem makadak anisüngzükdakjangma, ta paisa ashi.

Guwahati nung Dimapur nungi bener aoba opium apu



Guwahati, January 8, 2023 (Agencies): Honibarnü Guwahati nung New Delhi-i aoba Rajdhani Express train nung opium aika bena aliba apu.

Government Railway Police (GRP)-i Paltan Bazar police nung opium seret 12 apu aser iba

indang jenjang ya international market nung Rs 60 lakh lir. Iba dak sendakba nung police-i nisung shinga mapu lir.

Opium ya Nagaland kübok Dimapur nungi bener aruba liasü aser New Delhi-i bener aotsü lia apu, ta ketdangsur kati ashi.

"Osang tejangja ka angazükba sülen onoki Honibarnep platform number 1 nung 12423 down Dibrugarh-New Delhi Rajdhani Express mita repring" ta pai ashi.

"Onoki coach B 11 repringdang seat number 46 nung kibur maliba khu ka angu aser ibaji lapoka repringdang taseptsü 12 nung opium enoka liasü" ta GRP, Guwahati indang Officer-in-charge Prasenjit Das-i ashi.

"Opium ji seret 12 liasü aser black market nung Rs 60 lakh tema asütsü ta asadangtetogo. Mozü ya Dimapur nungi New Delhi-i bener aoba osang tejangja onoki angazükogo" ta OC Das-isa ashi.

Javelin Ana-i Miss Thounii-2023 tajok korang angu



Imphal, January 8, 2023 (Agencies): Manipur kübok Senapati district nung "Poumai Thounii" festival amondang arishi küm 20 Javelin Ana A-i Miss Thounii 2023 takok korang nguogo.

Poumai Thouni ya Poumai nunger indang benjung tulutiba lir. Poumai nunger ya Naga kin ka lir aser parnok teimbaka Manipur kübok Senapati District nung alir.

Javelin Ana A ya Purul Akutpa nung alir aser lai Rs 1 lakh senpet agizük. Maneni, Phuba (Koirengi) nung alir KR Ziiveine Megdalene-i tanabuba jenjang ngua Rs 75, 000 aser Phaibung (Makhrelui) nung alir Thounii S C-i tasembuba jenjang ngua Rs 40, 000 senpettem agizük.

Aiur 13 tashi Miss Thounii

2023 tetoktepba nung shilem agia liasü aser parnok rongnungi sub-titles 5- Miss Photogenic, Miss Talented, Miss Congeniality, Miss Personality aser Best Catwalk shima agütsü.

Iba tetoktepba nung tedendangertemji Banner Lanamai James, (Rubaru Mr India Youth Icon 2022), P Achevei (Mega Mister Northeast 2021-2022) aser Liba Julita (Former Miss Thounii) nunger liasü.

"Poumai Thounii" festival tembangba sentong United Naga Council (UNC) president Ng. Lorho-i tongti tesemdanger ama shilem agi aser pai "Sustaining culture" omen nung ajemdaker benjung amongba atema tenüngsang agütsü.

NFES-i NCC cadet tem nem training agütsü



Dimapur, Aenjeti/January 8 (TYO): Nagaland Fire & Emergency Services Mokokchung Unit-i ayogzüka, Fazl Ali College nung tang training Camp nung shilem agia aliba NCC Cadet tem atema demonstration cum training sentong ka katsüogo.

25 Naga Bn NCC-i ayongzüka January 5 nü nungi agia aliba Combined Annual Training Camp (CATC) nung shilem ka ama iba sentong agiogo. Training ya Sub Inspector Mayang-i anir NFES team kati agüja liasü.

Lecture cum demonstration sentong tembangba sülen cadet tem

nem practical nung tangazükba agüja liasü. NFES personnel temi mi adokba tapu balala indang rasa ashi aser mi remseptsü atema amshiba hadir balala indang metetdaksü, kong Fire Extinguisher, lisem, tzi, Ceiling Hooks anala densema lir.

Iba sülen cadets tem nem Fire Extinguishers tapu balala amshia mi remsepdakja liasü.

Kidang cooking gas cylinder leak asüba, electrical short circuit aser shi aodang mi adokba indang SI Mayang-i rasa ashi. Gas cylinder nungi mi adokba remsepdaktsütsü atema plastic bucket ka amshia sayuba ya talisa

tetsürtem cadet temi teka ma pelashishia agizüka liasü.

Fire Tender agi tashi agütsüba high pressure water jet amshiba yimya sayuba ya cadets temi kanga jangrabangra angazüka liasü.

Maneni lendong mapang nisung kümzüka yimya aser first aid tem indang cadet tem dang rasa ashi aser parnok Fire Mans Lift aser First Aid inyakyim nung shilem agidakja liasü.

Cadets temi NFES-i parnok nem life skills training agütsüba kanga temulung süa agizükba lemsatepa liasü, ta PRO Defence, Kohima sangdong ka ajanga metetdaksü.

Lakhimpur nung ali atsünga agirtem meindoktsü

Lakhimpur, January 8, 2023 (Agencies): Assam nung Lakhimpur district administration-i Forest indang ali 500 hectares nungi nisungtem meindoktsü maparen renemogo. January 10 nü Lakhimpur district nung eviction drive alitsü. Iba atema Deobarnü mock drill ka agiogo.

Lakhimpur district kübok Adhasona aser Mohaghuli yimtsüngtem nung forest land (500 hectares) nungi nisungtem meindoktsü. Iba ya Pava reserve forest indang ali atsünga agirtem lir.

Tesüiba küm 10 tsüngda kibong 700 temai Pava reserve

forest nung ali atsünga agiogo ta tai tongloksür.

Ozüng alema iba tesem nung alirtem ya Assam kübok tesem balala nungi arurtem aser tzümetsüng o anentsüh ajanga talidak malirtem lir.

Himanta Biswa Sarma-i Chief Minister inyaktsü tenzüka sülen nungi Assam district balala nung administration-i mapang shia sorkar ali atsünga agirtem meindokba maparen inyaka arur.

December 19, 2022 nü Nagaon district administration-ia Batadrava nung sorkar ali atsünga agir nisung 5,000 shi ka meindokogo.

Phek district atema E- Roll sangdongogo

Dimapur, Aenjeti/January 8 (TYO): Additional Deputy Commissioner HQ & Electoral Registration Officer, Phek, Nagaland T. Moa Lemtor-i, 16-Pfutsero, 17- Chizami, 18-Chozuba, 19- Phek & 20-Meluri Assembly Constituencies atema draft electoral roll amendments list,

2023 January 1 ya qualifying date ama aser Registration of Electors Rules, 1960 dak ajemdaker E-Roll renemba sangdongogo.

Iba E-Roll den shisema aliba amendments list sangdongogo aser ADC HQ, Phek office nung office mapang repringtetsü, ta paisa metetdaksü.



January 08, 2023 nü Raj Bhavan, Shimla nung state cabiinet minister tem tenangzükba agiba sülen Himachal Pradesh Angh, Rajendra Vishwanath Arlekar aser Chief Minister, Sukhvinder Singh Sukhu na den cabinet minister tem tangokba noksa nung angur.

MVA-i assembly aser Lok Sabha election nung longjemertokteptsü: Pawar

Kolhapur, January 08 (Agencies): Amongnü Nationalist Congress Party (NCP) tongti, Sharad Pawar-i

2024 küm Maharashtra Assembly elections aser Lok Sabha elections nung MVA teloktep nung aliba party temi longjemertokteptsü ayongzük.

MVA teloktep nung NCP, Uddhav Thackeray-i aniba Shiv Sena aser Congress lir.

Osangbenertem den jembidang Pawar-i, Shiv Sena party nung telemsa adokyonga Shiv Sena nung tongtipurtembo Uddhav Thackeray den dena lir, ta ashi.

Pawar-i, Shiv Sena nung telemsa adokba sülen MLA tem aser MP temi Eknath Shinde-i aniba Shiv Sena nung denogo, ajisüaka election atongdangbo nüburttem

taginüba meteta parnoki Thackeray-i aniba Shiv Sena nung adentsü, ta ashi.

2019 küm Maharashtra nung Assembly elections agiba sülen Thackeray-i Bharatiya Janata Party (BJP) den teloktep raksa aser NCP o Congress na den lokteper Maha Vikas Aghadi (MVA) teloktepi sorkar kuma liasü.

Yaküm June ita nung Shinde-i Shiv Sena bangdak anema nokdakba sülen sorkar chirepa liasü.

Tasüngdangba ka langzüdang Pawar-i, "Congress, NCP aser Uddhav Thackeray-i longjemertaruba elections (Lok Sabha aser Maharashtra) nung tokteptsü tangatetba lir. Republican Party aser tanga telok-a kar anioxtsüla, ajisüaka onoki o

lemtepdar," ta metetdaksü. Yaküm-a NCP tongti lenir Sharad Pawar-i, MVA-i longjemert Maharashtra Assembly elections nung tokteptsüla, ta jembia liasü.

Lok Sabha elections sangküm May ita nung agitsü aser Maharashtra Assembly elections taküm October ita nung agitsü.

Maharashtra aser Karnataka na tsüngda arrtsü mangatettep ken o dak sendakba nung Pawar-i, Maharashtra Chief Minister Eknath Shinde-i party balala den senden ka ayongzük lir; sorkari linük nung kanga mongintem anioker court nung iba ken o jembidaksütstila, ta ashi.

Tang iba ken o ya Supreme Court nung anendaka lir.

BJP lenir aser taoba mapang Bengal Angh, Keshari Nath Tripathi süogo

Kolkata, January 08 (Agencies): Taoba mapang West Bengal aser Bihar na densema state pezü nung Angh inyaksang, Keshari Nath Tripathi Amongnü Uttar Pradesh kübok Prayagraj nung par kidang lia alima nungi pilaogo; pa arrshi küm 88 liasü.

Tripathi ya Uttar Pradesh Legislative Assembly nung kümsük asembe tashi Speaker inyaka liasü. Pa teka sükdangba sülen hospital-i anir ao. Pa tangu sashiba tsütsüa timtema liasü aser kanga tambur akümba agi temang nung timtem balala liasü, ta BJP lenir kati metetdaksü.

"Tripathi mapang tatsüka ICU nug among aser pa temang tera tajungba akümba sülen kidangi anir oa liasü. Tanep 5:00 ako meta pa alima nungi pila," ta BJP lenir jagi phone ajanga osangbener nem metetdaksü.

Iba osang angashia Ato kilonser, Narendra Modi-i mangyim jashi lemsatep aser, Uttar Pradesh nung BJP yangerteter tongtiji Tripathi liasü, ta ashi.

"Keshari Nath Tripathi-i nübür tenzükba aser shisa

akaba agi aikati pa akhümtsüba liasü. Pai linük temzüng junga meteta liasü. UP nung BJP yangerba tsütsü pai tongti shilem agi aser state terenlok atema kanga meranga inyak. Pa asüba osang angashia jashir. Par kibong aser pa pusemertem den mangyim jashi lemsateper," ta Modi-i twitter ajanga lemsatep.

Tripathi ya 1934 küm November 10 nü Allahabad nung aso. Pa West Bengal nung July 2014 nungi July 2019 tashi Angh inyak. Ibaji masüdag pa Bihar, Meghalaya aser Mizoram nunga mapang tatsütsü Angh repsema inyaka liasü.

Keshari Nath Tripathi ya Uttar Pradesh legislative assembly nung kümsük trokben tashi züngsem liasü aser Janata Party yimsüsüba mapang pa 1977 nungi 1979 küm tashi state nung Institutional finance & sales tax minister liasü.

Pa ya sangro mejemer ka aser kaketzülur ka liasü. Pa Allahabad High Court nunga senior advocate inyak aser UP nung mapang tatsüka BJP Tir liasü.



January 08, 2023 anepdang Kartavya Path, New Delhi nung Indian Coast Guard sepaitemi taruba Republic Day Parade atema renemshidang tangokba noksa nung angur.

Sorkari arrtsülen tourism ajungkettsütsü: MoS Ajay Bhatt

New Delhi, Aenjeti/January 08 (Agencies): Linük International arrtsülen nüburttem lidaktsütsü atema sorkari inyakdar, aser arrtsülen tourism ajungkettsütsü atema sorkari inyakdar, ta Union Minister Ajay Bhatt-i metetdaksü.

Interview ka nung jembidang Union Minister of State for Defence & Tourism, Ajay Bhatt-i sorkar sentong balala lemsatepa liasü.

Tasüngdangba ka langzüdang minister-i, "Onoki arrtsülen tourism ajungkettsütsü atema inyaker. Nüburttem arrtsülen lidaktsütsü atema

meranga inyakdar. Ato kilonser Narendra Modi-i International Border anasa India nunger yim tatembangbuba Mana semdangogo. Northeastern region nunga arrtsülen tourism ajungkettsütsü tashi tulu lir," ta metetdaksü.

Arrtsülen tourism ajungkettsütsü atema mapatong kar yangludat aser mapatong karbo teinyakdar lir, ta shia pai, arrtsülen tesem aika nung climbing, scaling ice-clad peaks aser river rafting ayongzükä akar aser yimsü tsütsü tourism-a ajungkettsüdar, ta pai

metetdaksü. "Indian Army-i adventurous tourism ajungkettsür; Leh Ladakh tashi tours ayongzükä agir aser item ama sentongtemji Uttarakhand nunga agitsü. Tours ajanga sepai nung tenzüktsü atema lanurtem ajungmesotsü," ta pai metetdaksü.

Uttarakhand kübok Joshimath nung ali anenoka aiba aser kiojen kaksaba tensa dak sendakba nung tasüngdangba ka langzüdang pai, tang tensa nung ajemdaker sorkari Joshimath nung teinyakdak project balala anena lir, ta metetdaksü.

U'khand sorkari satellite ajanga Joshimath survey agitsü mepishi

New Delhi, January 08 (Agencies): Chamoli district kübok Joshimath nung ali anenoka aiba aser kiojen kaksaba dak sendakba nung Uttarakhand sorkari National Remote Sensing Centre (NRSC), Hyderabad aser Indian Institute of Remote Sensing (IIRS), Dehradun dang satellite noksatem ajanga Joshimath survey agia bushisüngdangba sülen noksa den külei report tejangja agütsüdagtsüner, ta mepishiogo.

State sorkarisa Geological Survey of India dang Joshimath nung Koti Farm, Herb Institute, horticulture department indang ali aser Pipalkoti kübok Semaldala areas nüburttem rehabilitation atema amshitsü asoshi asadangan, ta mepishi.

State Chief Minister, Pushkar Singh Dhama-i Joshimath nung anentsüh aluba, ali anenoka aiba aser kiojen raksaba tesemtem semdanga tongti ketdangsertem den senden amenba sülen sorkari institutions balala dang teyari meshir.

Iba dak alia IIT-Roorkee, Wadia Institute of Himalayan Geology, National Institute of Hydrology Roorkee aser Director CSIR, Central Building Research Institute Roorkee-ia Joshimath area survey agiogo aser parnoki kobi melii sorkar nem report agütsütsü.

Chief minister Dhama-isa District Magistrate Chamoli nem sen crore 11 tali agütsüsemogo. Secretary to the chief minister, R Meenakshi Sundaram aser Commissioner, Garhwal Division, Sushil Kumar na Amongnü nungi tenzükä Joshimath nung amongtsü aser tensa ajak mita ketdangtsütsü.

State nung high-level coordination committee ka tentetsü aser Joshimath nung anentsüh agi kongshiba tesemtem nung terenlok mapatem inyakttsü.

Iba committee nung tongtiji Additional Chief Secretary, Radha Raturi asütsü aser local area committee nung tongtiji Commissioner (Garhwal) Sushil Kumar asütsü.



January 08, 2023 nü Mumbai nung Maharashtra Angh, Bhagat Singh Koshyari-i Armed Forces nungi anisüngzükter alirtem den Tri-Services Veterans Day Parade nung shilem agiba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, AENJETI (JANUARY) 09, 2022

Pei kin asoshi bilemba

India nunger ta asüba ama, Naga nunger ta asüba ya kin balaka mejetteta maka saka kin aser oshi aika agi Naga kin ta asüba ya kuma lir. Iba jagi balaka Naga nungertem ya yimten aser lokti ka kubok telongjem temang ka kuma longjemmer moutetter. Aji oda, Naga kin dak aketba yimten aser lokti ken o shia nung Naga nunger kintem rongnung telemsa adokba agi asenok oti asuyonga moutetba timtem aika asenoki ajangshir. Item rongnungji Naga yimten nüchiso bushiba maparen nung telok paikaya lemsar aliba ya ka asütsü. Iba ama telemsa aser tebenja nung Naga nungertem aika mulungjang nung Naga nunger longjemtsü aser ajungtsü indang bilemer masü saka pei kin ajungtsü aser ajangzüksü indang bilemba agi, asenoki aiben kechi shitak ta bilema yariteper masü saka shir kin aser shir kinunger ta tama metettsü meranger. Atangji, Naga nunger yimkong asoshi tajung inyaksü mebilemyonga pei kin asoshi ajungtsü bilema inyakbaji Naga nunger ajangtsü asoshi inyakba den kasa lir. Ajisüaka, Naga nunger aika dak pei kin asoshi bilema inyakdang, ochimashi aser meshitak mapa ka nung asuyonga pei kin süra tenük amur yaritepba mapa ya asütsü. Shitakba agibo, pei nisung asuyonga tangari asen maginüba onükji ochimashiba nungi adok süra, ajibo pusemsüba masü saka arütsütsüla. Ajisüaka, asenok atema tia maka kaji, telong government nung asuyonga, tema government nung asuyonga kodang timtem aser tatsütep kar adokdir, jet ta onükji yimten onük masü saka pei kin onük kümer alir. Aji oda, nisungbaji shitak asü meshitak aser alang asü malang ta metettsü meranger masü saka pei kin aser pei nisung kümzüksü aser ajangzükdaksütsü merang dang, Nagaland nung ozünga maka aser inyakyima maka, shirnok tesashiba aser shirnoki tashiyim tuluba inyaktetter, parnoki mulungba nung Naga nungertem anidaker. Tanü Naga nunger asoshi timtem aser takoksaji yang nung jagi adoker. Aji oda, lokti ka nung lenisangji auer tetsüdi, tamajung aser ochimashiji pai inyaker, anungji tangari paji maginer, ajisüaka par kini pa pusema nokdaker ta asüba kinji Naga nungertem lir. Kasaji Naga nunger asoshibo pei kin süra ojang ta asüba nung ochimashi mapa ka nung asuyonga tenük amur yariteper. Aji oda, yimten nung takok angutsü atema tashiyim agi tangar ajak yiruja senzütsü aser kodang tangaria meyiper pa yirutsütsü merangdir, tangari tenük meremba agi arishir ta jembibaji Naga nunger kin lir. Iba amaji peibo tenük tajung saka tangerbo tenük temerem ta bilemba nübortemji asenok lir. Asen meyong agi tangar den lemsateptsü melen asenoki tangar meyong dena rakzüka agir, aser ibaji kodang temai adoka jembidir, tangar dak tenük merem aliba agi asenok arüshir ta jembibaji Naga kinsa lir. Ibaji mesüka asenok Aotsür Aortem rongnunga aiben lenirtemi anir lokti senden nung dena "Aor dak tenük merem agi sünga" lir ta jembir. Tetezü, tejembisang dak alaka tanüngba Aorbo ajak nükmerem agi sünga lir ta angatetdaksüner südi. Ajisüaka, asen kin aser asen lima ajangtsü atema aji meyipteptsüla aser " Aotsür Aorbo junger ser nung ni majung, kü dak nükmerem aser mokokaji lir, iba jagi ni' asen nisung aika ashioktsüogo, anungji ni melenshidi aser asenoka ochiba aser tim maparen nungbo longjemmer Naga kin asoshi inyakdi ta jembir tenzüksüla. Atangji, alima asünungji, tenükmerem yabo asen dak dang masü saka tangar kintem daka lir. Ajisüaka, asen dak nükmerem shisatsü tilaka aliba jagi asen dak tejungnü aser teyarinü shisatsü tajung tuluka alibaji mekokdaksütsüla. Iba jagi memeteti asen kin junga adoktsü. Asen kinbo aser asenokbo ochimashi aser tamajung nung masü saka ochi aser shitakba lenmang nung dang pusemtepa Naga nunger tejakleni anitsü merangertem asütsüla. Aji asünung dang, tamalen ama tanüa aser asünga tangari asen jilu tajung ajizüka anidaksü aser asenok pu asemtsü.

OLEMSABANG

2023 küm koda lia aotsü sentong renemer ?

~ L. Kika Pongener.

(Yashi adok nungi...)

Mungdang : Tanü asen Naga lima nung mungdangtem reprangdangra, teimba ka tamang yimsu mungdang masü, saka alima lokti-tentet (Organisation) ka dang mesuka kümadokogo. Inyakyim ajak nung tamangba yimsu yimya nung masü, saka alima lokti-tentet inyakyim (Liberal) dang kümadokogo. Mungdang teimba ka nung tenzüker shimyim aser ketdangsuba mapa nung tashishitsü keta tobur mejungi inyakba angudang nuburtem kanga sungmanger. Aji oda, tamanger arogotem longjemmer akümba mungdang yabo alima nem otsü/osang tamajung angashidaksüba sabang ka masü, saka tatishitsü tajung sayuba sabang ka asütsüla. Sorkar-i anir tanga lokti-tentet ajak dang ochi/shitak inyaka sayuba sabang ka asütsüla. Inyakyim ajak nung tanga lokti-tentet ajangi reprangzüka/ajizüka inyaksüsa meruk-meruka, meshi-meshia, asüngtet-asüngteta inyakya sayutsüla. Anungji 2023 küm ya mungdang ketdangsuba inyakyim meyipa reprangshiba aser yanglushiba küm ka sudaktsüdi.

Yimden : Asen Naga lima nung yimden aika dang lir, sorkar yimden, yimtsüng yimden, jila yimden, Non-Governmental-Organisation (NGO) yimden aser nujiso bushiba yimden. Alima nung yimden teimtiba agi yimsu asüba limaji asen Naga lima asütsü sudi. Sorkar dak alaka tanga yimden ajak nungji saru-saji dena lir, item saru-saji jagi Naga nunger kibongtem ajak alena lir aser kibong ajak dak meseper. Tema-telung temelen saru kati-kara onsaraba agi osettsüset nung jenjang tali atur aser ibajagi nuburtem/kibongtem dak mesuker. Joko asen Naga nunger nuburtemi temelen saru tapu-tapu saruba agi laaksetogo. Jila nungi tenzüker yimtsüngtem tashi nung yimden yimsusuba inyakyim reprangdangra teimba ka ochimashi (Corruption) agi sunga lir. Tanü jila aser yimtsüngtem aika nung rongsen akar, tashi (Power) akar, sentsü aketer kari yimden yimsusuba tashi ajak parnok ket nung ammer parnok mulungba nung yimden aniba ajanga tilar, sensaker aser meshi-mejungertem aika ola madokteti asüktema anidaker. Jila aser yimtsüng terenlok atema sorkar nungi anguba sen agi kar dang ajangzüker aser alimabo merenloker. Anungji 2023 küm ya yimden yimsusuba inyakyim meyipa reprangshiba küm ka sudaktsüdi.

Loktiliba : Tanü asen Naga lima nung lokti-tentet zünger-mezüngma, item lokti-tentet ajak nungji saru-molok madenba ka danga mali. Lokti-tentetbo tashi taitba-taitba akümer aser idangji kibongtembo tesensakba-tesensakba akümer. Nubur aika lokti-tentet onsara nung tanishir shilem agi ataba agi pei kibongbo telungi lujen alur. Loktiliba soro jungdaksütsü merangdang pei kibong soro mejungi akümer. Loktiliba takar kümdaksütsü merangdang pei kibong sensak adener. Loktiliba tejakleni anitsü merangdang pei kibong tangar memenepi tesuleni/langtsüngi alur. Joko Naga nunger nuburtem aikati item lokti-tentet saru-saji agi kibongtem alener ayuba agi laaksetogo. Lokti-tentet ajunga nung lennir teimba kati yangko semer tenzüker. Lokti-tentet ajunga nung tanishir menden raktepdang nuburtem tsüngda nung mepetmesu/telemsa adoker. Anungji kokrabangla, kangara menungdakba lokti-tentet karbo anena-adokba, mesura mayu-ang tajungba, kechiyong lokti-tentet onsaraba agi asen Naga nunger kibong aika sensak tiai ayir, aser ibajagi asen Naga lima rongsenketzüng nung jenjang kanga mejungi kümdaksür. Anungji 2023 küm yabo asen loktiliba meyipa reprangshiba aser yanglushiba küm ka sudaktsüdi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

ICETE-i Theological shisaliok renloktsü atema inyaksü



Tawa Turkey kübok Izmir nung linük 80 nungi Evangelical lenir 500 dak tema adenshia C-22 senden Group lemsar o lemtepbä mapang tangokba noksa nung angur. Iba senden nungji theological education terenlok atema longjemer inyaksü lemtetogo. C-22 senden ya International Council for Evangelical Theological Education (ICETE)-i ayongzük.

January 08, 2023: Tawa alima tesem balala nung Evangelical lenirtem adenshia theological education terenlok atema longjemer inyaksü asoshi o lemtepbä.

Linük 80 nungi Evangelical lenir 500 dak tema C-22 senden nungji shilem agia aden; iba senden ya International Council for Evangelical Theological Education (ICETE)-i ayongzük.

Turkey kübok Izmir nung ayongzükba senden nungji alima tesem ajaklen theological education terenlok atema longjemer inyaksü lemteta liasü.

Iba senden nung talisa pastoral training aser leadership development atema jembiba den külemi formal aser non-formal training tsüngda ongdang malitsü atema jembä.

Kasa senden nung non-formal training jenjang ajungkettsü, theological education nung technology taliba amshitsü, tanela tsütsü tashi itshitsü aser lanurtem nem theological shisaliok agütsütsü atema o lemtepbä liasü.

International Director of ICETE, Dr Michael A Ortiz-i, "Iba senden ya onok indang 'logo' aser tangatetba balala

toktsür kati ka tenzükteptsü aser telung nung aliba temai adoka inyaksü nükjidong nung ayongzük," ta metetdaksü.

"Shilem agirtemi tarutsü nung theological education atema otsü tasen tenzüksü atema mangdang yuogo: iba otsüji ajanga lenla ajak ayimjemsü atema longjemer inyaksü, aser item ajakji Arogo tashi itdaksütsü atema lir," ta Dr Michael-isa metetdaksü.

Iba senden nung Arogo lenirtem training agütsüba ajanga ajak tajangzük angutsü aser taliba amalitepa inyaksü atema shisa lemsatepogo, ta Dr Michael-i metetdaksü.

ICETE indang partner-World Evangelical Alliance (WEA) Secretary General, Thomas Schirrmacher-i, "Tarutsü Arogoji tarutsü lenirtem lir, ibayongji tanü onoki shisaliok, training aser lenirtem anitetba nung rongsen-nübo indoker. Ibaji ajanga taruaba küm 10-20 tsüngda Arogo temelenshi adoktsü. Tang iba ama ICETE senden ajanga asen tarutsü jenjang latettsü," ta metetdaksü.

Küm 40 tejaklen World Evangelical Alliance (WEA) nungi International Council for Evangelical Theological

Education (ICETE) ya tenteta liasü, aser tanübo iba ya alima nung Evangelical theological education atema tiyongtsü ka kümogo.

ICETE organization ya 1970s nung regional evangelical theological institute networks indang project ka nungi tenzüik aser 1980 nung official süa Theological Commission of the World Evangelical Alliance-i tenteta liasü.

2015 küm tashi nung linük 113 nung ICETE nung member school 1,000 liasü.

ICETE indang sponsors ji-Association for Christian Theological Education in Africa (ACTEA), Asia Theological Association (ATA)Caribbean, Caribbean Evangelical Theological Association (CETA), European Council for Theological Education (ECTE), Euro-Asian Accrediting Association (E-AAA), Association for Evangelical Theological Education in Latin America (AETAL), Middle East-North Africa Association for Theological Education (MENATE), Association for Biblical Higher Education (ABHE) aser South Pacific Association of Evangelical Colleges (SPAEC) lir.

ANOGO ABEN TSÜNGREM DEN

Wabang aser Kümzük

T.Ken 59: 1-17

Na kichiba ajanga lendong nungi kümzükdanga lir asü ? Iba lemang nungi Paul Damaska nung kümzük (T.M.9) aser Dawida kichiba nungi kümzük (1Sam. 19). Kenü Dawid kidangi ao aser pa miima tempangogo ta putet. Tebutsü pa kichiba ajanga odaktsü aser pa tsükchirtem nungi kümzük. Iba ken nung Dawid kümzükba tejangja lemang pezü angur.

Mezüngbuba, Tsüngremi angur ta Dawidi metet, anungji pai sarasadem (t. 1-5). Dawid wabangtsü aser kümzüksü nungdaka liasü. Pa tsükchirtemi pa indang tiyazü ashi. Nai tai memena sür timatemtsübaji tasak. Saka Tsüngrem Chuba menden nung lir aser Pai asenok repranga alir. Pai asenok timtem metet. Kodang na timtem nung lidir, Tsüngremi na ngua lir ta bilemtetang. Pa dang sarasademang- Pai angaa lir.


Tanabuba, Tsüngremi angashir ta Dawidi tejangja meteta liasü, anungji pai ataa ali (t. 6-9). Kodang asenoki ataa lidir, Tsüngremi mapa aika ataloktsü, aser asenok tashi itshir (t.9; Isa. 40:31).

Tasembuba, Tsüngremi yimsü asür ta Dawidi metet, anungji pai ataa ali (t. 10-13). Tsüngrem Dawid den taochi agi ajurutep aser tsükchir den obendangba agi ajurutep. Tsüngremi tsükchirtem prokshidakjang ta sarasadem, parnok anenjang aser samajang ta sarasadem.

Pezübuba, Tsüngremi kümzüker ta Dawidi metet, anungji pai ken aten (t.14-17). Asenoki tetibo nüburtem mapa anendaktsütsü makok. Dawid tebutsü pa oadoktsüla mesüra anepdangbo pa asütsü ta tekümdangtsü agütsü (1Sam. 19:11), aji odasüaka pai anepdang Tsüngrem taochi ken atentsü koka liasü (t.16). Tsüngremi sarasadem langzür külen teti Pa tenüng sangang.

Tsükchirtemi na arishidang nai ne tamang koda amshir? Sarasadem ajanga langzüang, ataang, amangang aser ken tenang.

Dionne Warwick aser Dolly Parton nati osangtajung ken ka sayatsü



Dionne Warwick & Dolly Parton

January 08, 2023: Kentener nungtugu, Dionne Warwick-i, Dolly Parton tenati osangtajung ken ka sayatsü; iba kenji Parton-i zülü, ta metetdaksü.

Warwick-i "Tamron Hall Show" nung shilem agiba

mapang nung tenati ken tasen record süa sayatsü aliba osangi metetdakja liasü.

Warwick-i, "Lai (Dolly Parton) ken ka record südaktsünüa kü dangi ken ka yok, anungji ni la dang hai ta ashi. Lai kü dangi ano ken ka

yok- aser ibaji künati aten. Iba kenji osangtajung ken 'Peace Like a River' lir," ta metetdaksü.

"Ni kanga pelar. Tesüiba küm aika tsüngda ni nisung anati atenba ken (duet) aika nung shilem agiogo, ajisüaka iba yabo khenyongi balaka asütsü," ta lai metetdaksü.

Warwick-i, iba ken ya khenyongi balaka asütsü, kechiyong lar kinünger, Whitney Houston aser Parton na tesendaktep junga liasü, ta ashi.

"Iba ya jelia tiatsüba liasü. Iba ya Tsüngremer sentong ka lir," ta Warwick-i ashi.

"Peace Like a River" kenji kodang sayatsüar ano mejangja.

Yaküm Dolly Parton 'Rock & Roll Hall of Fame' nung shimokba sülen tang la rock kensep ka atema mazüngi inyakdar.



January 08, 2023 nü Longkong yimdak ABAM Executive Secretary, Rev. Dr Mar Pongener-i Longkong Baptist Arogo küm 100 ajungba Jubilee nungshilong sarasadema semzüksüadang tangokba noksa nung angur.

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Ongküp

(n) süptsü, anü kanga meyalokba tesem (cold and damp place)

* **Ongküp** nung atangba süngjang tasen asür.

Onglaongshi

(v) ola agüja washia aruba (battle cry)

* Nokinketertem tongpang nungi **onglaongshia** aru.

OLONG PAITEP # 6394

1			2			3		4
5		6						
						7		
8								
								9
		10				11		
			12			13		
14								
						15		
16								

TIPIEN

- 2. Auo nung chiyongsü asenba
- 5. Mangyimba mapang
- 7. O tamendakdak
- 8. Pei dak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

LANGTSÜNGLEN

- 1. Lenmang
- 2. Aor kidong ka tenüung
- 3. Tenarong maten
- 4. A _ _ _ g
- 6. Mopung apodoka
- ola adokdaksüba
- 9. Tongtipang tagitsü
- 10. Menungra bilem
- 11. Aiür
- 13. S _ _ _ k
- 14. T _ _ _ r

OLONG PAITEP # 6393 TELANGZÜBA

TIPIEN :

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem,
- 15. Tambu, 16. Khuret,
- 17. Sang.

LANGTSÜNGLEN :

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok,
- 12. Amang, 14. Jala.

Agüja aliba noksa nung meputepi aliba 9 bushiang



Tanur asoba anogo nung salem osang den noksa angati adokdaksünüra - Tenüung, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüung :
- 2. Tasoba anogo:
- 3. Küm :
- 4. Class :
- 5. School :
- 6. Talidak :
- 7. Salem osang :

Karbi Anglong nung Rs 16 crore jenzang heroin apu



Karbi Anglong nung Rs 16 crore jenzang heroin apuba noksa nung angur.

Diphu, January 8, 2023

(Agencies): Assam Police-i January 8 nü Karbi Anglong district nung mozü shibelener nisung ana apu aser tena ket nung Rs 16 crore jenzang heroin apu.

Assam Police aser Central Reserve Police Force (CRPF) külem telok kati Dilai Tinali tesem nung garitem mita repringdang gari ka nung Rs 16 crore alang heroin seret 3.5 bena aliba angu.

Heroin ji sapon pongdang nung taseptsü 286 nung miima enoker liasü. Iba atema Barpeta nung alir Golap Khandakar (29) aser Sahanur Mir (21) na apu.

Gari ka (AS-01 MC-4996) mita repringdang heroin bena aliba angu ta Bokajan Sub Divisional Police Officer (SDPO), John Das-i ashi.

Assam Chief Minister Himanta Biswa Sarma-ia police nem tenüngsang agütsüba osang metetdaksüogo.

January 7, 2023 nü Government Railway Police-ia New Delhi-i aoba Rajdhani express train ka nung opium aika bena aliba apu.

Tarin nung opium seret 12 bena aliba apu aser iba indang jenzang Rs 10 lakh shi asütsü ta police-i ashi.

"Mozüji Dimapur nungi bener aruba liasü aser tang tashi nung iba dak sendakba nung nisung ka danga mapu lir" ta police-isa ashi.

Assam nung Disadvantaged Sections nisung 1,000 angati heart surgery agitsü

Guwahati, January 8, 2023

(Agencies): Rajkot nung amenoka aliba Prashanti Medical Services & Research Foundation ajanga Assam sorkar den Disadvantaged Sections nungi tanur aser tain 1,000 indang heart surgeries sen agütsütsü atema tenangzüktep ka agiogo.

Assam health department aser Prashanti Medical Services & Research Foundation tsüngda sign sütepba MoU nung Rajkot aser Ahmedabad nung aliba Sri Sathya Sai Heart Hospitals nung tanur 500 aser tain 500 heart surgeries asütsüba shia lir.

Sri Sathya Sai Hospitals ya Prashanti Medical Services &

Research Foundation ajanga lapokba lir. Prashanti Foundation ya charitable trust ka lir aser India nung heart surgeries angati agiba ya parnok dang lir.

"Assam sorkari nübortem nem healthcare services dalang agütsütsü merangba nung iba MoU ya ka lir. Prashanti Medical Services & Research Foundation-i Assam nung disadvantaged sections nem iba teyari agütsüba atema atema kanga pelar" ta Chief Minister Dr. Himanta Biswa Sarma-ia ashi.

"Iba tenangzükba kübok shirangertem surgery aser iba dak sendakba teyari ajak

Prashanti Medical Services & Research Foundation ajanga agütsütsü aser state sorkari oliaruli ta senzüba aser shirangertem o parnok anepalurtemi sen tilateri endokba agütsütsü" ta Assam CM Sarma-isa metetdaksü.

Iba MoU sign sütepba sentong nung Health & Family Welfare Minister Keshab Mahanta, Guwahati High Court Chief Justice R.M. Chhaya, Guwahati High Court Justices- N Koteswar Singh o Suman Shyam, Principal Secretary (Health) Avinash Joshi aser Prashanti Medical Services Foundation Managing Trustee Manoj Bhimani nunger aden.

NPP-i Uniform Civil Code magizüker: Meghalaya CM Conrad

Shillong, January 8, 2023

(Agencies): National People's Party (NPP)-i Uniform Civil Code (UCC) magizüker ta Meghalaya chief minister Conrad Sangma-ia ashi.

"Political party ka ama onoki UCC ya magizüker" ta Meghalaya CM aser NPP national president Conrad-ia ashi.

"Ozüng kecha agia

Meghalaya nunger sobaliba aser libaliro nung timtem magütsütsüla. Centre sorkari parnoki inyaknüba mapa kar alitsü akok saka itemji onoki memetet" ta paisa ashi.

"UCC ajanga tanuri kiojen ronsen senmangba nung kongshitsü. UCC ajanga tangalen inyakba ama jabaso tambusang nem agüjang ta shira

ibaji Meghalaya nunger sobaliba den meputep kechiyong kin aika nung jala tanutsüla nem agütsür" ta Conrad Sangma-ia ashi.

"UCC indang tangatetbaji ajak kasa dang asütsüba lir aser iba ajanga Meghalaya nung sobaliba inyaksangshi aika melentsü, anungji onoki ibaji magizüker" ta paisa shisem.



Border Security Force (BSF) sepaitemi South West Khasi Hills district kübok Jamador yimtsüung nung Rs 30 lakh alang nisung indang kou seret 300 apu. Kou ya Shillong nungi ayong ajanga Bangladesh-i bener aodang apu. Nisung indang kou ya wigs yangluba nung kanga amshir aser iba ya alima nung nüngdaka bushiba ka lir. Bangladesh ajanga China aser Taiwan dangi kou kanga belener. Taoba mapang iba ozüngi noktangba inyakyim ya Myanmar nungi kanga inyaka liasü ta BSF otongdar kati ashi.

Mali nung sota aliba Ivory Coast nungner sepaitem chiokogo

Abidjan, Aenjeti/January 8 (Agencies): Ita trok tashi Mali nung tepuokdak aliba sülen Ivory Coast nungner sepaite kidangi meyipa yokogo. Parnok ya tangar asoshi taa agir inyaksangshiba sepaitem (mercenaries) ta aija sota ayu.

Sepaitem ya Ivory Coast kübok Abidjan airport Honibar aonung tonga aru. Mali nung military yimsüsüri parnok nem taitok agütsüba sülen kidangi meyipa yoka liasü.

Taoba kum July ita Mali yimtiba Bamako nung sepaitem apuba sülen kidanger linük ana tsüngda mangatettep tulu adoka liasü.

Mali-i parnok ya mercenaries tem ta shia aitsü aser kasa mapang nung Ivory Coast-i ashiba agi, item sepaitem ya United Nations peacekeeping mission kübok German contingent ka nem teyari agütsütsü atema yokba liasü.

Honibarnü kidangi meyipa aruba mapang sepaitem ajaki linük wako tilala bener liasü aser Ivory Coast tir Alassane Ouattara-i parnok pelashishia agizüka liasü.

"Iba mepetmesü ya tesülen toktsüogo aser Mali den maneni

taoba mapang ama tesendaktep yanglushir aotsü," ta Ouattara-i ashi.

Sepaitem otongdar kati Ouattara aser Ivory Coast nungertem dak parnok teyari asoshi kanga pelaba lemsatepa liasü.

"Onok tetsü tasoli-i meyipa arutetba atema kanga pelar aser anisüngzüker," ta pai ashi.

Bamako court kati parnok kum 20 tepyuokdak ayutsü atema obendang agütsüba sülen anogo ishika lir chioka liasü. Mali sorkar anema tasa tamajung asara inyaksangshitsü merangba aser state security inyaksangshi nung tetsükdaktsü adokdaktsüba atema aija parnok nem iba obendang agütsür liasü. Airport nung apuba sepaite 49 rongnung tetsür asem densema liasü. Parnok asem ya taoba mapang chioker liasü.

Economic Community of West African States (ECOWAS) lenirtemi January ka nü tashi nung sepaitem mechokra Mali nem tenokdangba balala agütsütsü ta shir liasü.

Ajisüaka Hokolbarnü Mali indang military lenir Assimi Goita-i parnok 49 prongla nem

tatok agütsü.

Mali sorkari Republic of Mali aser Republic of Ivory Coast na tsüngda tesendaktep tajungba küma yanglushitsü atema tenangzüktepba ka yanglur aliba indang shisema liasü.

Parnokisa Togo tir Faure Gnassingbe dang kanga pelaba lemsatep shibai ken o bentettsü atema tongtibang shilem agia liasü.

2020 kum August ita Goita-i anir military-i nüburtemi shimba tir Ibrahim Boubacar Keita atsingtokba sülen Mali aser kidanger linüktem tsüngda tesendaktep mejungi aküm. Linük yimsüsür tasentemi taoba kum February ita tashi nungbo election agitsü nangzük, saka mapang tatsüka lir election agitsü hopta ishika dang lia kum pezü sülenang election agitsü sangdonga liasü.

Iba jenjang agiba sülen ECOWAS-i Mali nem tenokdangba agütsü aser iba ajanga linük rongsenketzung lemta kümdaktsü.

Bamako-i ita 24 tsüngda election agitsü aser electoral ozüing tasen ka amenoktsü nangzükba sülen tenokdangba agütsüba ya July ita agina liasü.

Pak sorkar den ceasefire atema jembishinütsü mulunga lir: TTP chief

Peshawar, Aenjeti/January 8 (Agencies): Tehreek-e-Taliban Pakistan (TTP) tekolakbai ashiba agi, Pakistan sorkar den ceasefire atema sensaksemstsü asoshi par telok renema lir, ta media sangdong balala ajanga metetdaktsü.

2022 kum June ita sorkar den ceasefire atema tenangzüktepba ka yanglur aliba TTP-i taoba kum November ita agin aser par telok nung züngsemtem dang security force tem amaktsü atema tetuyuba agüja liasü.

TTP ya al-Qaida den sendaktepa alitsü ta amanger aser parnok anem sorkari maneni jenjang tesashi agira parnoki Ato Kilonser Shehbaz Sharif aser Foreign Minister Bilawal Bhutto na dena amaktsü ta amokmerena liasü.

Ajisüaka parnoki sorkar den ceasefire atema tenangzüktepba yanglur aliba ya magin ta ashir.

"Islamic Emirates of Afghanistan teyongtsüi ia onoki Pakistan sorkar den sensaksemogo. Ceasefire atema sensaksemstsü asoshi mulunga lir," ta TTP tekolakba Mufti Noor Wali Mehsood-i Honibarnü ashiba Dawn newspaper sangdong ka ajanga metetdaktsü.

Mehsood-i Pakistan nung tamangba yimsü tesayurtem nungi shisatsü agidar ta ashiba

mapang ka nung tang pa tamendakdak melenshir.

Video osang ka ajanga Mehsood-i, onok jihad ya tai ta bilemra Pakistan nung tamangba yimsü lenirtem nungi shisatsü agitsü atema onoki mulunga lir, ta ashiba Express Tribune newspaper sangdong ka ajanga metetdaktsü.

"Onoki ayongzükba jihad nung timtem aliba reprantetra, onok lenmang melenshiogo ta bilemra, onok mashileni ogo ta bilemra onok dang lenmang sayutsü mepeshir. Nenok tebilemba angadangtsü atema onok renema lir," ta TTP tekolakbai ashi.

Pakistan nung azütokshi lendong tali küma aoba mapang ka nung Mehsood-i iba olen lemsatepa liasü.

Honibarnü Pakistan police-i Punjab province nung meita aoba sentong ka ayongzüka agiba mapang TTP kiralongrar pongu pua liasü.

South Waziristan tribal district headquarters Wana nung Hokolbarnü nisung 5000 dak temai longkak aita liasü. Parnok aliba tesem nung nisung pur aoba, kiralongrar inyakyim tali akümba aser mesüngjemteti akümba anema iba longkak aitba sentong ayongzüka agia liasü.

Linük nung kiralongrartemi asendenshir tesem aika aser talisa Khyber Pakhtunkhwa aser Balochistan province nung

tesem balala amakba mapang ka nung iba longkak aitba sentong ayongzüka agiogo. Tesem balala ya TTP telungpurtemi amaker ta bilemer.

TTP dang ya Pakistan Taliban ta ajar aser parnok ya telungpur telok balala atema umbrella telok ka ama 2007 kum amenok.

Parnok nükjidongji Pakistan nung Islam ozüing tesashi benoktsü atema lir.

Afghanistan nung Taliban puri sorkar kümtetba sülen TTP züngsemtem mintoka Pakistan anema parnok litsü mamshidaktsütsü atema Pakistan-i imla liasü, ajisüaka Kabul-i Islamabad den tesendaktep raksaka iba jenjang agitsü memulunger.

TTP puri Pakistan kübok tesem aika makogo, kong 2009 kum army headquarters amakba, military base balala amakba, 2008 kum Islamabad nung Marriott Hotel amakba densema lir.

2012 küma TTP puri Nobel laureate Malala Yousafzai maka liasü.

2014 nung Pakistan Taliban telok yagi Peshawar nung Army Public School ka amak. Iba lendong nung kaketshir 131 densema nisung 150 tepset. Iba school amakba ajanga alima ajunga aoksadaktsü aser parnok kanga mejungi aija liasü.

MENUNGRAR



ASÜR PANGERJUNGLA

Asüba anogo: 09.01.2022

Lai onok nungi anojungi akümüli toktsür kum ka junga oaka, la onok molungjang nungi mepilar. La temeim sarasadem, sayubentsü o aser tejungnü yimyatem asoshi teti bilemteter aser ozü molungjang taroktiba nungi la menungra amunger.

Tsüngremer sendong aser Pa temeim mapatem asoshi tenüing asanger.

Temeim Tsürapur, Adianu aser Kinungertem.

Mulungnen O



Asür Imtinungsang Longchar, Chungtia
29.03.1969 - 28.12.2022

Teti dang meima aliba **asür Imtinungsang Longchar** (Chungtia) shirang yipden nung aliba mapang nungitenzüka tasüba anogo tashi kija, kibong aser lokti tentet balala agi nubu, rongsen, shisatsu aser sarasadem agi nungita yariba dang masu, ano ozü mulung zureba mangyimba mapang asüku lemsatepa yariba asoshi tepang agi rasa-a meshitetba kanga-sa pelaba lemsateper.

Takoksang Tsüngremiti nenok ajak tali dang moajangma.

Temiem kinungtsü, chirnur aser kinungertem.

Menungra Bilemteter



Late. Marsüsü (Mongsenyimti)
Asü - 9th January 2022

Oba, nai onok toktsür oer tanü kum ka abensaka onok mulungjangi ne tetemjen tebedi menürem jakden, sayu tajungtem bilemteta nüklai arua na longraa sarasadema amongera ni. Teyangluri ne nüla anisüngzüka yujangma.

Temeim kinungertem.

Sabalenka aser Djokovic nati Adelaide International kokogo



Aryna Sabalenka

Novak Djokovic

Aenjeti/January 8, 2023 (Agencies): Second-seeded asayar Aryna Sabalenka-i Deobarnü Adelaide International tetsür kija asaya final nung qualifier Linda Noskova madak takok ngua WTA Tour kija asaya 11buba kokogo.

Final asaya nung lai 6-2 7-6 (4) agi Linda madak takok ngua liasü, koba küm ana shi lir la asoshi mezüngbuba asayamung akokba asütsü.

Sabalenka-i final akokba ajanga arishi küm 18 tain Noskova-i iba asayamung nung kanga junga asaya aliba tembangdaksü. Noskova-i main draw nung third-seeded Daria Kasatkina aser taoba Australian Open champion Viktoria Asarenka na koka final tonga liasü.

Sabalenka-i hopta tepeyong asayaba mapang set ka nung danga tamakok mangu aser Deobarnü final asayaba mapanga lai mezüngbuba set ayong ayonga akok.

Ajisüaka tanabuba set nung Noskova-i kanga junga asaya

aser la indang serve ka danga break mesüdaktsüba den Sabalenka-i service aoba mapang kanga nongshia asaya.

"Hopta tepeyong kanga junga asayaba atema ni Noskova nem tenüngsang agütsür," ta Sabalenka-i ashi.

"Na tarutsü nung kanga junga asayayonga aotsü aser final asaya aika nung shilem agütsü," ta laisa Noskova tenüngsanga ashi.

Sabalenka-i tatemsa 2021 küm May ita Madrid nung kija asaya ka koker liasü. 2022 küm la final asem tashi tonga asaya ajisüaka takok marok ka danga mongutet.

La season-ending WTA Finals atema qualify asüba sülen 2022 küm jenjang pongububa nung tembang. WTA Finals nung la Caroline Garcia-i tsükdakja liasü.

Adelaide nung asayamung akokba sülen Sabalenka-i season ka nung mezüngbuba asayaba asayamung asem kokogo. Lai 2019 küm Shenzen aser 2021 küm Abu

Dhabi nung asayamung koka.

Maneni kasa asayamung tebur kija asaya Novak Djokovic-i kokogo. Final asaya nung Djokovic-i America nung asayar Sebastian Korda 6-7 (8), 7-6 (3), 6-4 agi koka liasü.

Adelaide nung Daniil Medvedev den semifinal asayaba sülen Djokovic-i pa hamstring nung timtem ka lir ta ashiba ajanga Australia Open ayongertem shisabuludakja liasü, ajisüaka final asaya nung pa tetsüng nung timtem aliba kecha merprangteti liasü.

Deobarnü iba asayamung akokba sülen Djokovic-i pa indang career nung kija asaya 92buba kokogo. 2007 küm arishi küm 19 asüba mapang pa iba asayamung mezüng akokba sülen küm 16 lir taküm tanabenbuba kokogo.

"Taonung asaya ajaki jangradema repranger alitsü ta amanger. Hopta tepeyong jangradema asayaogo," ta Djokovic-i asaya tembangba sülen ashi.

Naomi Osaka Australian Open nung masayatsü



Naomi Osaka

Aenjeti/January 8, 2022 (Agencies): Australian Open anaben tashi koker aliba Japan tsür Naomi Osaka-i taküm iba asayamung nung shilem magütsü asoshi telemtetba agiba Deobarnü sangdongogo.

Osaka-i iba asayamung nung shilem magütsü atema telemtetba agiba sülen la melena Ukraine tsür Dayana Yastremska main draw nung asayatsü asoshi maongka nguogo.

"Naomi Osaka-i Australian Open nung masayatsü atema telemtetba agiogo. La #AO2023 nung shilem magütsü. La melena Dayana Yastremska main draw-i iogo," ta Australian Open ayongertemi Deobarnü tweet asü.

Osaka-i Melbourne nung asayaba asayamung ya 2019 aser 2021 küm kokogo. 2022 küm US Open tetsür kija asaya nung United States tsür Danielle Collins-i 6-7 (5-7), 3-6 agi

makokba sülen Osaka tang tashi nung asayamung ka nung danga shilem agia mali.

Taoba küm Melbourne nung taoba mapang No.1 asayar ya tasembuba round tonga asaya, kong la Amanda Anisimova-i 4-6, 6-3, 7-6(5) agi tsükdakja liasü.

Australian Open nung masayatetsüsa akümba asayartem rongnung Osaka ya tesüsabuba asütsü.

Kasa mapang nung Grand Slam tenetben tashi koker aliba asayar Venus Williams-ia iba asayamung nung shilem magütsü atema telemtetba agia liasü. La Auckland, New Zealand nung ASB Classic asayaba mapang yiruba sülen iba asayamung nung shilem magütsüsa aküm.

Taküm Australia Open ya January 8 nungi 30 tashi asayatsü renema lir. Asayamung atema mezüngbuba qualifier asayaba sülenang main draw asaya tenzüksü.

Gulmarg Ski Resort nung Khelo India National Winter Games asayatsü

Aenjeti/January 8, 2023

(Agencies): Jammu and Kashmir kübok Baramulla district nung amenoka aliba Gulmarg ski resort nung taruba ita tasembuba Khelo India National Winter Games ayongzüka asayatsü, ta ketdangsürtemi Deobarnü sangdong ka ajanga metetdaksü.

Tasembuba Khelo India National Winter Games ya February 10 nü tenzüksü aser February 14 nü tembangtsü, ta parnokisa metetdaksü.

Taküm linük kübok tesem balala nungi asayar 2000 shi Gulmarg nung adenshia asaya balala nung tokteptsü.

Ketdangsürtemi ashiba agi, asaya tongtibangtem rongnung snow shoe race, ice skating, ice hockey, skiing, nordic ski, snowboarding, ski mountaineering aser ice stock

densema lir.

Iba asayamung ayongzüka asayatsü atema renemshiba dak sendakba nung secretary tourism, Sarmad Hafeez lenisüba nung Honibarnü Civil Secretariat nung senden ka ayongzüka mena liasü.

Senden nung ketdangsürtem den jembiba mapang Hafeez-i, iba asayamung ajanga Jammu and Kashmir nung saisapong ajungketba dang masü saka linük kübok tesem balala nungi aser bendanger alima penzürttem atsüa arutsü asoshi teyari agütsütsü, ta ashi.

Secretary-isa, sorkar kübok department balala aser jurila agencies tem dang iba asayamung takok ngua asayatsü atema jelia sentong ajak renemer atatsü asoshi ayongzüka liasü.

Chelsea-i Ivory Coast nung asayar Fofana alizükogo



David Datro Fofana

Aenjeti/January 8, 2022

(Agencies): Chelsea-i Honibarnü sangdong ka ajanga Ivory Coast nung forward David Datro Fofana den küm trok ser tesadang atema tenangzüktepba ka yangluba sangdongogo

David Datro Fofana ya Norwegian champions Molde nungi alizüka liasü.

Arishi küm 20 tain asayar yagi Stamford Bridge nung 2029 küm tashi asayatsü atema tenangzüktepba ka yangluogo aser iba den ano küm ka atsülangtsü atema lenmang sadema lapoka yuogo, ta club-isa metetdaksü.

Fofana taa ya pound million 8 nungi million 10 tsüngda asütsü ta bilemer.

Fofana-i Chelsea ya pai mapa talangka nungi asayanüa aliba club ka ta ashiba club indang website ajanga

metetdaksü.

"Fan tem, ni aruogo aser ni mapang talangka nungi asayanüa aliba club ka den tenangzüktepba yangluba atema kanga pelar. Asayaba moapu nung yakta ajuruteptsü yongya atar," ta pai ashi.

David Datro Fofana ya tawa-ang Ivory Coast national team nung asaya tenzüka. Pai Molde nungi asaya 65 nung asayaogo aser iba mapang goal 24 idaktsü aser assist 10 süja liasü.

Chelsea pur tang Premier League point table nung jenjang 10buba nung lir aser parnoki January transfer window nung Monaco nungi France nung defender Benoit Badiashile alizükogo.

Osang ajanga ashiba agi, Chelsea-i France nung asayar atema euro million 40 (\$42 million) agüja liasü.

BILEMDANGANG

"O tanep jembitsüji tasak masü, saka item o jagi aika ajangzüker."